

Ո Ր Ո Շ ՈՒ Մ N 0233

(մաքսային վճարների գանձման վերաբերյալ)

22 սեպտեմբերի 2014թ.

ք. Երևան

ՀՀ Ֆինանսների նախարարության Արարատյան տարածաշրջանային մաքսատան պետ Ա. Քոչարյանս, ուսումնասիրելով «Քենփորթ» ՍՊ ընկերության (ՀՎՀՀ-00109378, ք. Երևան, Կոմիտսի 44/76) կողմից 2013թ-ի մարտի 18-ին թիվ C 8362 ԲՄՀ-ով «Ներմուծում՝ ազատ շրջանառության համար» մաքսային ռեժիմով ձևակերպված առաջնային ձևի պոլիվինիլքլորիդի մաքսային ձևակերպման փաստաթղթերը,

Պ Ա Ր Զ Ե Ց Ի

«Քենփորթ» ՍՊ ընկերությունը 2013թ-ի մարտի 18-ին թիվ C 8362 ԲՄՀ-ով «Ներմուծում՝ ազատ շրջանառության համար» մաքսային ռեժիմով հայտարարագրել է առաջնային ձևի պոլիվինիլքլորիդ, որի ավելացված արժեքի հարկի վճարումը, ըստ վերը նշված մաքսային հայտարարագրի, հետաձգվել է մինչև 18.03.2014թ., սակայն ընկերությունը սահմանված ժամկետում չի վճարել այդ ռեժիմով նախատեսված ավելացված արժեքի հարկը: Հայտարարագիրը 18.03.2013թ-ին ընդունվել է մաքսային մարմնի կողմից, ինչի կապակցությամբ հայտարարագրի վրա նշվել է հայտարարագրի ընդունման համարը և ամիս, ամսաթիվը (թիվ L 7096): ՀՀ մաքսային օրենսգրքի 25-րդ հոդվածի համաձայն՝ «Ներմուծում՝ ազատ շրջանառության համար» մաքսային ռեժիմը կարգավորում է ապրանքների և տրանսպորտային միջոցների ներմուծումը Հայաստանի Հանրապետության մաքսային տարածք՝ առանց հետագա արտահանման պարտավորության: Մաքսային այս ռեժիմի շրջանակներում օրենքով սահմանված չափով և դեպքերում գանձվում են մաքսային վճարներ: 18.03.2013թ-ի թիվ C 8362 ԲՄՀ-ով «Ներմուծում՝ ազատ շրջանառության համար» մաքսային ռեժիմով հայտարարագրված առաջնային ձևի պոլիվինիլքլորիդի համար մինչև 18.03.2014թ. ենթակա է վճարման ավելացված արժեքի հարկ և տույժեր՝ սահմանված ժամկետում ԱԱՀ-ի գումարները չվճարվելու համար:

«Ավելացված արժեքի հարկի մասին» ՀՀ օրենքի 6¹-րդ հոդվածի 3-րդ մասի համաձայն՝ նույն հոդվածով սահմանված կարգով ԱԱՀ-ի վճարման ժամկետի հետաձգմամբ ՀՀ ներմուծված ապրանքների մասով մաքսային մարմինների կողմից հաշվարկված ԱԱՀ-ի գումարները վճարվում են պետական բյուջե մինչև հետաձգման ժամկետը լրանալու օրը, եթե ԱԱՀ-ի գումարների վճարման ժամկետի հետաձգումը նույն հոդվածի երկրորդ մասով սահմանված դեպքերում չի դադարեցվել և (կամ) ԱԱՀ-ի վճարման հետաձգման ժամկետը դադարելու օրվան հաջորդող տասնօրյա ժամկետում՝ նույն հոդվածի երկրորդ մասով սահմանված դեպքերում: Սահմանված ժամկետում ԱԱՀ-ի գումարները չվճարվելու դեպքում օրենքով սահմանված տույժերի հաշվարկումը, իսկ հարկ վճարողի կողմից տույժերը

հաշվարկված լինելու դեպքում՝ դրա նկատմամբ հսկողությունն իրականացնում է հարկային մարմինը: Մաքսային մարմինների կողմից հաշվարկված ԱԱՀ-ի գումարները վճարվում են որպես մաքսային մարմինների կողմից պետական բյուջե հավաքագրվող գումարներ, իսկ սահմանված ժամկետում չվճարված գումարների նկատմամբ հաշվարկված տույժերը վճարվում են որպես հարկային մարմինների կողմից պետական բյուջե հավաքագրվող գումարներ:

Հաշվարկ՝

Հիմք ընդունելով ՀՀ ՖՆ Արարատյան տարածաշրջանային մաքսատան գանձումների համակարգման և հաշվառման բաժնի մաքսային տեսուչ Կ. Կարապետյանի կողմից կազմված տեղեկանքով ներկայացված հաշվարկը՝ «Քենփորթ» ՍՊ ընկերության կողմից թիվ C 8362 մաքսային հայտարարագրով հայտարարագրված ապրանքի համար 18.09.2014թ-ի դրությամբ ՀՀ պետական բյուջե ենթակա է վճարման **1270 663 ՀՀ դրամ** ԱԱՀ:

Ելնելով վերոգրյալից և ղեկավարվելով ՀՀ մաքսային օրենսգրքի 25-րդ, «Ավելացված արժեքի հարկի մասին» ՀՀ օրենքի 6-րդ, 6¹-րդ և «Վարչարարության հիմունքների և վարչական վարույթի մասին» ՀՀ օրենքի 53-րդ և 58-րդ հոդվածներով՝

Ո Ր Ո Շ Ե Ց Ի

1. «Քենփորթ» ՍՊ ընկերությունից հոգուտ պետբյուջեի գանձել **1270 663 ՀՀ դրամ** ԱԱՀ-ի գումար:
2. Որոշման մասին օրենքով սահմանված կարգով տեղյակ պահել «Քենփորթ» ՍՊ ընկերությանը:

Որոշումն ուժի մեջ է մտնում այն ստանալու պահից և «Վարչարարության հիմունքների և վարչական վարույթի մասին» ՀՀ օրենքի 10-րդ գլխի նորմերին համապատասխան կարող է երկամսյա ժամկետում բողոքարկվել վերադատության կարգով կամ ՀՀ վարչական դատավարության օրենսգրքով սահմանված կարգով վարչական դատարան:

Որոշումը կամավոր չկատարվելու դեպքում այն կկատարվի «Դատական ակտերի հարկադիր կատարման ծառայության» միջոցով՝ պարտապանի հաշվին:

Մաքսատան պետ



Ա. Քոչարյան